

四庫全書

子部

欽定四庫全書

子部

尚論篇卷四

上至
下

詳校官太醫院吏目_臣宋桂

編修_臣倉聖脈覆勘

總校官庶吉士_臣倉聖脈

校對官編修_臣沈清藻

謄錄監生_臣馮萬程

欽定四庫全書

尚論篇卷四上

新建 喻昌 撰

尚論太陰經證治大意

仲景傷寒論六經中惟太陰經文止九條方止二
道後人致惜其非全書昌細繹其所以約畧之意
言中風即不言傷寒言桂枝即不言麻黃言當溫
者則由宜四逆輩全是引伸觸類之妙可見治法

總不出三陽外但清其風寒之原以定發汗解肌
更於腹之或滿或痛間辨其虛實以定當下當溫
而已了無餘義矣是非深入閭奧者孰能會其為
全書也哉

太陰經全篇

法九條

一太陰之為病腹滿而吐食不下自利益甚時腹自痛

若下之必胸下結鞭

原文

腹滿自利太陰之本證也吐而食不下則邪迫於上

利甚而腹痛則邪迫於下上下下交亂胃中空虛此但可行溫散設不知而誤下之其在下之邪可去而在上之邪陷矣故胸下結鞭與結胸之變頗同胃中津液上結胸中陽氣不布卒難開也

二太陰中風四肢煩疼陽微陰澀而長者為欲愈

原文

四肢煩疼者脾主四肢亦風淫末疾之驗也陽脈微陰脈澀則風邪已去而顯不足之象但脈見不足正恐元氣已漓暗伏危機故必微澀之中更察其脈之

長而不短知元氣未漓其病為自愈也註不審來意
謂瀉為血凝氣滯大謬豈有血凝氣滯反為欲愈之
理耶

三太陰病脈浮者可發汗宜桂枝湯

原文

太陰脈尺寸俱沉細今脈浮則邪還於表可知矣故
仍用桂枝解肌之法也 太陽經中以浮緩為中風
浮緊為傷寒故此不重贅但揭一浮字其義即全該
風邪用桂枝湯其脈之浮緩不待言矣然則寒邪之

脈浮緊其當用麻黃湯更不待言矣况少陽篇中云
設胸滿脇痛者與小柴胡湯脈但浮者用麻黃湯早
已挈明用麻黃湯之義故於太陰證中但以桂枝互
之乃稱全現金彰也不然同一浮脈何所見而少阻
當用麻黃太陰當用桂枝也哉

四自利不渴者屬太陰以其藏有寒故也當溫之宜服

四逆輩

原文

註謂自利不渴溫邪也故用四逆輩以燠土燥濕此

老生腐譚非切要也仲景大意以自利不渴者屬太陰以自利而渴者屬少陰分經辨證所關甚鉅蓋太陰屬濕土熱邪入而蒸動其濕則顯有餘故不渴而多發黃少陰屬腎水熱邪入而消耗其水則顯不足故口渴而多煩燥若不全篇體會徒博註釋之名其精微之蘊不能闡發者多矣

五傷寒脈浮而緩手足自溫者繫在太陰太陰當發身黃若小便自利者不能發黃至七八日雖暴煩下利日

十餘行必自止以脾家實穢腐當去故也

原文

太陰脈本緩故浮緩雖類太陽中風然手足自溫則不似太陽之發熱并不似少陰厥陰之四逆與厥所以繫在太陰允為恰當也太陰脈見浮緩其濕熱交盛勢必蒸身為黃若小便自利者濕熱從水道暗泄不能發黃也前陽明篇中不能發黃以上語句皆同但彼以胃實而便鞭其證復轉陽明此以脾實而下穢腐其證正屬太陰耳至七八日暴煩下利日十餘

行其證又與少陰無別而利盡穢腐當自止則不似少陰之煩燥有加下利漫無止期也況少陰之煩而下利手足反溫脈緊反去者仍為欲愈之候若不辨晰而誤以四逆之法治之幾何不反增危困耶雖陽明與太陰腑臟相連其便鞭與下利自有陽分陰分之別註家歸重於脾謂脾為胃行津液則如此不為胃行津液則如彼似是而非全失仲景三陰互發之

旨

六本太陽病醫反下之因爾腹滿時痛者屬太陰也桂枝加芍藥湯主之

原文

太陽病之誤下其變皆在胸脇以上此之誤下而腹滿時痛無胸脇等證則其邪已入陰位所以屬在太陰也仍用桂枝解肌之法以升舉陽邪但倍芍藥以收太陰之逆氣本方不增一藥斯為神耳

七大實痛者桂枝加大黃湯主之

原文

大實大滿宜從急下然陽分之邪初陷太陰未可峻

攻但於桂枝湯中少加大黃七表三裏以分殺其邪可也

八太陰為病脈弱其人續於便利設當行大黃芍藥者宜減之以其人胃氣弱易動故也

原文

此段叮嚀與陽明篇中互發陽明曰不轉失氣曰先鞭後澹曰未定成鞭皆是恐傷太陰脾氣此太陰證而脈弱便利減用大黃芍藥又是恐傷陽明胃氣也尚論篇卷四上

欽定四庫全書

尚論篇卷四中

新建 喻昌 撰

尚論少陰經證治大意

傳經熱邪先傷經中之陰甚者邪未除而陰已竭
獨是傳入少陰其急下之證反十之三急溫之證
反十之七而宜溫之中復有次第不同毫釐千里
粗工不解必於曾犯房勞之證始敢用溫及遇一

切當溫之證反不能用詎知未病先勞其腎水者不可因是遂認為當溫也必其人腎中之真陽素虧復因汗吐下擾之外出而不能內返勢必藉溫藥以回其陽方可得生所以傷寒門中亡陽之證最多即在太陽已有種種危候至傳少陰其辨證之際仲景多少遲徊顧惜不得從正治之法清熱奪邪以存陰為先務也今以從權溫經之法疏為前篇正治存陰之法疏為後篇俾業醫者免臨歧

之惑云

少陰經前篇

凡本經宜溫之證悉列此篇

一少陰病始得之反發熱脈沉者麻黃附子細辛湯主之

之原文

脈沉為在裏證見少陰不當復有外熱若發熱者乃是少陰之表邪即當行表散之法者也但三陰之表法與三陽迥異三陰必以溫經之藥為表而少陰尤為緊關故麻黃與附子合用俾外邪出而真陽不出

纔是少陰表法之正也

二少陰病得之一二日口中和其背惡寒者當灸之附

子湯主之

原文

得之一二日即上條始得之之互文口中和者不渴
不燥全無裏熱其背惡寒則陽微陰盛之機已露一
斑故灸之以火助陽而消陰主之以附子湯溫經而
散寒也

三少陰病得之二三日麻黃附子甘草湯微發汗以二

三日無裏證故微發汗也

原文

不吐利煩燥嘔渴為無裏證既無裏證病尚在表可知故以甘草易細辛而微發汗又溫散之緩法也

四少陰病欲吐不吐心煩但欲寐五六日自利而渴者屬少陰也虛故引水自救若小便色白者少陰病形悉具小便白者以下焦虛有寒不能制水故令色白也

原文

欲吐不吐心煩腎氣上逆之徵也自利而渴加以口燥舌乾引水自救似乎傳經熱病之形悉具然腎熱

則水道黃赤若小便色白又非腎熱證乃下焦虛寒不能制水仍當從事溫法不可誤認為熱而輕用寒下也

五病人脈陰陽俱緊反汗出者亡陽也此屬少陰法當咽痛而復吐利

原文

陰陽俱緊傷寒之脈也傷寒無汗反汗出者無陽以固護其外所以邪不出而汗先出也少陰之邪不出則咽痛吐利一一顯少陰之本證即當用少陰溫經

散邪之法不言可知矣

六少陰病脈微不可發汗亡陽故也陽已虛尺脈弱瀉者復不可下之

原文

亡陽不可發汗與上條互發亡與無同無陽則其邪為陰邪陰邪本宜下然其人陽已虛尺脈弱瀉者復不可下其當亟行溫法又可見矣

七少陰病下利若利自止惡寒而踰卧手足溫者可治

原文

惡寒踈卧證本虛寒利止手足溫則陽氣未虧其陰寒亦易散故可用溫法也

八少陰病惡寒而踈時自煩欲去衣被者可治

原文

自煩欲去衣被真陽擾亂不寧然尚未至出亡在外故可用溫法也

九少陰病脈緊至七八日自下利脈暴微手足反溫脈緊反去者為欲解也雖煩下利必自愈

原文

三條互見此則邪解陽回可勿藥自愈之證即緊去

自安之互詞也

十少陰病身體痛手足寒骨節痛脈沉者附子湯主之

原文

身體痛手足寒骨節痛脈沉皆寒邪入少陰之本證
即當用附子湯行溫經散寒之定法也

十一少陰病吐利手足厥冷煩燥欲死者吳茱萸湯主
之原文

吐利厥冷而至於煩燥欲死腎中之陰氣上逆將成

危候故用吳茱萸以下其逆氣而用人參薑棗以厚土則陰氣不復上千此蓋溫經兼用溫中矣

十二少陰病下利白通湯主之

原文

下利無陽證者純陰之象恐陰盛而隔絕其陽故用白通湯以通其陽而消其陰也

十三少陰病下利脈微者與白通湯利不止厥逆無脈乾嘔煩者白通加豬膽汁湯主之服湯脈暴出者死微

續者生

原文

與白通湯反至厥逆無脈乾嘔而煩此非藥之不勝病也以無鄉導之力宜其不入耳故復加人尿猪膽汁之陰以引陽藥深入然脈暴出者死微續者生亦危矣哉故上條纔見下利早用白通圖功於未著真良法也

十四少陰病二三日不已至四五日腹痛小便不利四肢沉重疼痛自下利者此為有水氣其人或欬或小便利或下利或嘔者真武湯主之 原文

陰寒內持濕勝而水不行因而內滲外薄甚至水穀不分或欬或利泛溢無所不之非賴真武坐鎮北方之水寧有底哉太陽篇中厥逆筋惕肉瞤而亡陽者用真武湯之法已表明之矣茲少陰之水濕上逆仍用真武一法以鎮攝之可見太陽膀胱與少陰腎一藏一府同居北方寒水之位府邪為陽邪藉用麻桂為青龍藏邪為陰邪藉用附子為真武得此二湯以滌痰導水消陰攝陽其神功妙濟真有不可思議者

矣

十五少陰病下利清穀裏寒外熱手足厥逆脈微欲絕身反不惡寒其人面赤色或腹痛或乾嘔或咽痛或利止脈不出者通脈四逆湯主之其脈即出者愈

原文

下利裏寒種種危殆其外反熱其面反赤其人反不惡寒而手足厥逆脈微欲絕明係羣陰隔陽於外不能內返也故倣白通之法加葱入四逆湯中以入陰迎陽而復其脈也前條云脈暴出者死此條云脈即

出者愈其辨最細蓋暴出則脈已離根即出則陽已返舍繇其外反不發熱反不惡寒真陽尚在軀殼然必通其脈而脈即出始為休徵設脈出艱遲其陽已隨熱勢外散又主死矣

十六少陰病脈沉者急溫之宜四逆湯

原文

外邪入少陰宜與腎氣兩相搏擊乃脈見沉而不鼓即內經所謂腎脈獨沉之義其人陽氣衰微可知故當急溫之以助其陽也

十七少陰病飲食入口即吐心下溫溫欲吐復不能吐始得之手足寒脈弦遲者此胸中實不可下也當吐之若膈上有寒飲乾嘔者不可吐也急溫之宜四逆湯

原文

飲食入口即吐猶曰胃中不能納穀也若不飲食之時復欲吐而不能吐明係陰邪上逆矣此等處必加細察若始得之便手足寒而脈弦遲即非傳經熱邪其為陰邪上逆無疑當從事乎溫經之法也若胸中實者是為陽邪在胸而不在腹即不可用下而當吐

以提之也然必果係陽邪方可用吐設膈上有寒飲
乾嘔即是陰邪用事吐必轉增其逆計惟有急溫一
法可助陽而勝陰矣

十八少陰病下利脈微澀嘔而汗出必數更衣反少者
當溫其上灸之

原文

下利而脈見陽微陰澀為真陰真陽兩傷之候矣嘔
者陰邪上逆也汗出者陽虛不能外固陰弱不能內
守也數更衣反少者陽虛則氣下墜陰弱則勤努責

也是證陽虛本當用溫然陰弱復不宜於溫一藥之
中既欲救陽又欲護陰漫難區別故於頂之上百會
穴中灸之以溫其上而升其陽庶陽不致下陷以逼
迫其陰然後陰得安靜不擾而下利自止耳此證誤
用藥以溫其下必逼迫轉加下利不止而陰立亡故
不用溫藥但用灸法有如此之回護也 前條用吳
茱萸湯無溫其中此條用灸法獨溫其上妙義天開
令人舞蹈

十九少陰病吐利手足不逆冷反發熱者不死脈不至

者灸少陰七壯

原文

既吐且利手足逆冷者其常也若反發熱則陽氣似非
衰憊然正恐真陽越出軀殼之外故反發熱耳設脈
不至則當急溫無疑但溫藥必至傷陰故於少陰本
穴用灸法以引其陽內返斯脈至而吐利亦將自止
矣前條背惡寒之證灸後用附子湯者陰寒內凝定
非一灸所能勝此條手足反熱止是陰內陽外故但

災本經以招之內入不必更用溫藥也絲絲入扣

二十少陰病惡寒身蹇而利手足逆冷者不治

原文

陰盛無陽即用四逆等法回陽氣於無何有之鄉其不能回者多矣故曰不治

二十一少陰病吐利煩燥四逆者死

原文

上吐下利因至煩燥則陰陽擾亂而竭絕可虞更加四肢逆冷是中州之土先敗上下交征中氣立斷故主死也使早用溫中之法寧至此乎

二十少陰病下利止而頭眩時時自冒者死

原文

下利既止其人似可得生乃頭眩時時自冒者復為死候蓋人身陰陽相為依附者也陰亡於下則諸陽之上聚於頭者紛然而動所以頭眩時時自冒陽脫於上而主死也可見陽回利止則生陰盡利止則死矣

二十三少陰病四逆惡寒而身蹇脈不至不煩而燥者

死

原文

四逆惡寒身踈更加脈不至陽已去矣陽去故不煩
然尚可施種種回陽之法若其人復加燥擾則陰亦
垂絕即欲回陽而基址已壞不能回也

二十四少陰病六七日息高者死

原文

諸陽主氣息高則真氣上逆於胸中本實先撥而不
能復歸於氣海故主死也六七日三字辨證最細見
六七日經傳少陰而息高與二三日太陽作喘之表
證迥殊也

二十五少陰病脈微沉細但欲卧汗出不煩自欲吐至五六日自利復煩燥不得卧寐者死

原文

脈微沉細但欲卧少陰之本證也汗出不煩則陽證悉罷而當顧慮其陰矣乃於中兼帶欲吐一證欲吐明係陰邪上逆正當急溫之時失此不圖至五六日自利有加復煩燥不得卧寐非外邪至此轉增正少陰胃中之真陽擾亂頃刻奔散即溫之亦無及故主死也

少陰經後篇

凡少陰傳經熱邪正治之法悉列此篇

一少陰之為病脈微細但欲寐也

原文

陽脈滑大陰脈微細外邪傳入少陰其脈必微細而與三陽之滑大迥殊衛氣行陽則寤行陰則寐邪入少陰則氣行於陰不行於陽故但欲寐也此少陰之總脈總證也

二少陰病脈細沉數病為在裏不可發汗

原文

沉細之中加之以數正熱邪入裏之徵熱邪入裏即

不可發汗發汗則動其經氣而有奪血亡陽之變故示戒也

三少陰病欲而下利譫語者被火氣劫故也小便必難以強責少陰汗也

原文

少陰之脈從足入腹上循喉嚨繫繞舌根故多咽痛之證其支別出肺故間有咳證今以火氣強劫其汗則熱邪挾火力上攻必為咳以肺金惡火故也下攻必為利以火勢逼迫而走空竅故也內攻必譫語以

火勢燔炳而亂神識故也小便必難者見三證皆妨
小便蓋肺為火熱所傷則膀胱氣化不行大腸奔迫
無度則水穀併趨一路心胞燔灼不已則小腸枯涸
必至耳少陰可強責其汗乎

四少陰中風陽微陰浮者為欲愈

原文

風邪傳入少陰仍見陽浮陰弱之脈則其勢方熾必
陽脈反微陰脈反浮乃為欲愈蓋陽微則外邪不復
內入陰浮則內邪盡從外出故欲愈也少陰傷寒之

愈脈自可類推

五少陰病欲解時從子至寅上

原文

各經皆解於所王之時而少陰獨解於陽生之時陽進則陰退陽長則陰消正所謂陰得陽則解也即是推之而少陰所主在真陽不可識乎

六少陰病八九日一身手足盡熱者以熱在膀胱必便血也

原文

少陰病難於得熱熱則陰病見陽故前篇謂手足不

逆冷反發熱者不死然病至八九日陰邪內解之時
反一身手足盡熱則少陰必無此候當是藏邪傳府
腎移熱於膀胱之證也以膀胱主表一身及手足正
軀殼之表故爾盡熱也膀胱之血為少陰之熱所逼
其出必趨二陰之竅以陰主降故也

七少陰病但厥無汗而強發之必動其血未知從何道
出或從口鼻或從目出是名下厥上竭為難治

原文

強發少陰汗而動其血勢必逆行而上出陽竅以諸

發汗藥皆陽經藥也或口鼻或耳目較前證血從陰竅出者則倍甚矣下厥者少陰居下不得汗而熱深也上竭者少陰之血盡從上而越竭也少陰本少血且從上逆故為難治然則上條不言難治者豈非以膀胱多血且從便出為順乎

八少陰病得之二三日以上心中煩不得卧黃連阿膠

湯主之

原文

心煩不得卧而無燥證則與真陽發動迥別蓋真陽

發動必先陰氣四布為嘔為下利為四逆乃致煩而
且燥魄汗不止耳今但心煩不卧而無嘔利四逆等
證是其煩為陽煩乃真陰為邪熱煎熬如日中纖雲
頃刻消散安能霾蔽青天也哉故以解熱生陰為主
治始克有濟少緩則無及矣

九少陰病二三日至四五日腹痛小便不利下利不止
便膿血者桃花湯主之

原文

腹痛小便不利少陰熱邪也而下利不止便膿血則

下焦滑脫矣滑脫即不可用寒藥故取乾薑石脂之
辛澀以散邪固脫而加糯米之甘以益中虛蓋治下
必先中中氣不下墜則滑脫無源而自止也註家見
用乾薑謂是寒邪傷胃欠清蓋熱邪挾少陰之氣填
塞胃中故用乾薑之辛以散之若混指熱邪為寒邪
寧不貽誤後人耶

十少陰病下利便膿血者桃花湯主之少陰病便膿血
者可刺

原文

證兼下利便膿血則用桃花湯若不下利而但便膿血則可刺經穴以散其熱即上文之互意也

十一少陰病下利咽痛胸滿心煩者猪膚湯主之

原文

下利咽痛胸滿心煩少陰熱邪充斥上下中間無所不到寒下之藥不可用矣又立猪膚湯一法以潤少陰之燥與用黑驢皮之意頗同若以為燂猪皮外毛根薄膚則發劣無力且與熬香之說不符但用外皮去其內層之肥白為是此藥大不可忽陽微者用附

子溫經陰竭者用豬膚潤燥溫經潤燥中同具散邪之義比而觀之思過半矣

十二少陰病二三日咽痛者可與甘草湯不差者與桔梗湯原文

邪熱客於少陰故咽痛用甘草湯者和緩其勢也用桔梗湯者開提其邪也此在二三日他證未具故可用之若五六日則少陰之下利嘔逆諸證蠱起此法又未可用矣

十三少陰病咽中痛半夏散及湯主之少陰病咽中傷生瘡不能語言聲不出者苦酒湯主之

原文

熱邪挾痰攻咽當用半夏滌飲桂枝散邪若劇者咽傷生瘡音聲不出桂枝之熱既不可用而陰邪上結復與寒下不宜故用半夏雞子以滌飲潤咽更有藉於苦酒之消腫斂瘡以勝陰熱也

十四少陰病四逆其人或欬或悸或小便不利或腹中痛或泄利下重者四逆散主之

原文

傳經熱邪至於手足四逆最當辨悉若見咳利種種之證其為熱證無疑矣然雖四逆而不至於厥其熱未深故主此方為和解亦如少陽經之用小柴胡湯為一定之法矣讀者詳之

十五少陰病下利六七日咳而嘔渴心煩不得眠者猪苓湯主之

原文

下利六七日日本熱去寒起之時其人尚兼欬渴心煩不眠等證則是熱邪搏結水飲以故羈留不去用猪

苓湯以利水潤燥不治利而利自止也

十六少陰病得之二三日口燥咽乾者急下之宜大承

氣湯

原文

得病纔二三日即口燥咽乾則腎水之不足上供可知延至五六日始下必枯槁難回矣故宜急下以救腎水也

十七少陰病自利清水色純青心下必痛口乾燥者急下之宜大承氣湯

原文

熱邪傳入少陰逼迫津水注為自利質清而無渣滓
相雜色青而無黃赤相間可見陽邪暴虐之極反與
陰邪無異但陽邪傳自上焦其人心下必痛口必乾
燥設係陰邪必心下滿而不痛口中和而不燥必無
此枯槁之象故宜急下以救其陰也

十八少陰病六七日腹脹不大便者急下之宜大承氣
湯原文

六七日腹脹不大便則胃土過實腎水不足以上供

有立盡之勢又非少陰負趺陽反為順候之比此時下之已遲安得不急

十九少陰負趺陽者為順也

此條叔和編入厥陰今移附少陰

少陰水也趺陽土也諸病惡土尅水而傷寒少陰見證惟恐土不能制水其水反得以泛溢水一泛溢則嘔吐下利無所不至究令中州上敗而真陽外越神丹莫救矣故予其權於土則平成可幾予其權於水則昏墊立至此脈法中消息病情之奧旨也

按少陰水藏也水居北方原自坎止惟挾外邪而動則波翻浪湧橫流逆射無所不到為嘔為欬為下利為四肢沉重仲景不顧外邪惟以真武一法坐鎮北方之水水不橫溢則諸證自止而人之命根賴以攸固命根者何即父母構精時一點真陽伏藏於腎水之中者是也水中火發所以其證雖陰其人反煩燥多汗而似陽仲景每用乾薑附子白通之法以收攝其陽初不慮夫外感蓋陽出則

腠理大開外感先出所以一回陽而了無餘義也
若用寒涼以助水則真陽不返而命根斯斷矣
其有腎水衰薄邪入不能橫溢轉而內挾真陽蘊
崇為患外顯心煩舌燥咽痛不眠等證即不敢擅
用汗下諸法以重傷其陰但用黃連阿膠湯苦酒
湯猪苓湯猪膚湯四逆散之類以分解其熱而潤
澤其枯於中雖有急下三證反無當下一證所以
前方俱用重劑潤下一日三服始勝其任設熱邪

不能盡解傳入厥陰則熱深者其厥亦深而咽痛者轉為喉痺嘔欬者轉吐癰膿下利者轉便膿血甚者發熱厥逆燥不得卧仍是腎氣先絕而死也必識此意然後知仲景溫經散邪之法與清熱潤燥之法微細曲折與九轉還丹不異後人窺見一斑者遇陰邪便亟溫遇陽邪便亟下其鹵莽滅裂尚不可勝言況於聾瞶之輩乎茲分前後二篇暢發其義有知我者諒不以為僭也

欽定四庫全書



尚論篇

主

尚論篇卷四中

欽定四庫全書

尚論篇卷四下

新建 喻昌 撰

尚論厥陰經證治大意

厥陰雖兩經交盡之名然厥者逆也腎居極下逆行而上以傳於肝故名曰厥陰也邪傳厥陰其熱深矣熱深多發厥厥證皆屬於陽以陽與陰不相承接因致厥也厥後發熱陽邪出表則易愈厥多

熱少則病進熱多厥少則病退所以仲景雜用三陽經治法即讖語之當下者但用小承氣湯微和胃氣他證皆不用下正欲其熱多而邪從外出耳然厥證多兼下利則陽熱變為陰寒者十居其七蓋木盛則胃土受剋水穀奔迫胃陽發露能食則為除中木盛則腎水暗虧汲取無休腎陽發露面赤則為戴陽繇是陽微則厥愈甚陽絕則厥不返矣所以溫之灸之以回其陽仍不出少陰之成法

也但厥而下利陰陽之辨甚微不便分為二篇故發其奧於篇首俾讀者先會其意云

厥陰經全篇

法五十五

一厥陰之為病消渴氣上撞心中疼熱饑而不欲食食則吐衄下之利不止

原文

消渴者飲水多而小便少也厥陰屬木厥陰邪甚則腎水為之消腎消則引水以自救故消而且渴其渴不為水止也氣上撞心中疼熱者肝氣通於心也

饑不能食者木邪橫肆胃土受制也食則吐虵者胃中饑虵嗅食則出也下之利不止者邪屬厥陰下則徒虛陽明陽明虛木益乘其所勝也此條文義形容厥陰經之病情最著蓋子盛則母虛故腎水消而生渴母盛則子實故氣撞心而疼熱然足經之邪終與手經有別雖仰闕而攻究不能入心之郭廓也至胃則受俯凌之勢無可逃避食則吐而下則利不止矣亦繇邪自陽明傳入胃氣早空故易動耳

二厥陰中風脈微浮為欲愈不浮為未愈

原文

厥陰之脈微緩不浮中風病傳厥陰脈轉微浮則邪還於表而為欲愈

三厥陰病欲解時從丑至卯上

原文

丑寅卯厥陰風木之王時故病解

四厥陰病欲飲水者少少與之愈

原文

五諸四逆厥者不可下之虛家亦然凡厥者陰陽氣不相順接便為厥厥者手足逆冷者是也

原文

厥即四逆之極陰陽既不相順接下則必至於脫絕也

厥陰證仲景總不欲下無非欲邪還於表而陰從陽解也此但舉最不可下之二端以嚴其戒耳

手之三陰與手之三陽相接於手足之三陰與足之三陽相接於足陰主寒陽主熱故陽氣內陷不與陰氣相順接則手足厥冷也然四肢屬脾脾為陰與胃之陽不相順接亦主逆冷所以厥證雖傳經熱邪復

有不盡然者最難消息

六傷寒脈遲六七日而反與黃芩湯徹其熱脈遲為寒
今與黃芩湯復除其熱腹中應冷當不能食今反能食
此名除中必死

原文

脈遲為寒寒則胃中之陽氣已薄不可更用寒藥矣
腹中即胃中胃煖乃能納食今胃冷而反能食則是
胃氣發露無餘其陽亦必漸去而不能久存故為必
死除者去也與除夕之義同又除者授也與授擊帶

之義同

七傷寒始發熱六日厥反九日而利凡厥利者當不能食今反能食者恐為除中食以索餅不發熱者知胃氣尚在必愈恐暴熱來出而復去也後三日脈之其熱續在者期之旦日夜半愈所以然者本發熱六日厥反九日復發熱三日并前六日亦為九日與厥相應故期之旦日夜半愈後三日脈之而脈數其熱不罷者此為熱氣有餘必發癰膿也

原文

少陰經中內藏真陽最患四逆故云吐利手足不逆
冷反發熱者不死厥陰經中內無真陽不患其厥但
患不能發熱與夫熱少厥多耳論中恐暴熱來出而
復去後三日脈之其熱尚在形容厥證重熱之意匠
心滿志讀者不可草草然得熱與厥相應尤無後患
若熱氣有餘病勢雖退其後必發癰膿以厥陰主血
熱與血久持不散必至壅敗也

八傷寒先厥後發熱而利者必自止見厥復利傷寒先

厥後發熱下利必自止而反汗出咽中痛者其喉為痺
發熱無汗而利必自止若不止必便膿血便膿血者其
喉不痺

原文

先厥後熱下利止其病為欲愈矣乃反汗出咽中痛
是熱邪有餘上攻咽喉挾濕痰而為痺也然既發熱
即無汗而邪亦外出所以利必自止若不止則無汗
明係邪不外出仍在於裏必主便膿血也便膿血者
其喉不痺見熱邪在裏即不復在表在下即不復在

上也

九傷寒一二日至四五日厥者必發熱前熱者後必厥
厥深者熱亦深厥微者熱亦微厥應下之而反發汗者
必口傷爛赤

原文

前云諸四逆厥者不可下矣此云厥應下之者其辨甚
微蓋先四逆而後厥與先發熱而後厥者其來迥異
故彼云不可下此云應下之也以其熱深厥深當用
苦寒之藥清解其在裏之熱即名為下如下利譏語

但用小承氣湯止耳從未聞有峻下之法也若不用苦寒反用辛甘發汗寧不引熱勢上攻乎口傷爛赤與喉痺互意

十傷寒病厥五日熱亦五日設六日當復厥不厥者自愈厥終不過五日以熱五日故知自愈

原文

厥終不過五日即上句之註脚見熱與厥相應陰陽一勝一復恰恰相當故可勿藥自愈

十一傷寒脈微而厥至七八日膚冷其人燥無暫安時

者此為藏厥非虵厥也虵厥者其人當吐虵今病者靜而復時煩者此為藏寒虵上入其膈故煩須臾復止得食而嘔又煩者虵聞食臭出其人當自吐虵虵厥者烏梅圓主之又主久利

原文

此條微旨千百年來全無識者昌於篇首總括大意挈出腎陽胃陽二端原有所自藏厥者正指腎而言也虵厥者正指胃而言也曰脈微而厥則陽氣衰微可知然未定其為藏厥虵厥也惟膚冷而燥無暫安

乃為藏厥藏厥用四逆及灸法其厥不回者主死若
虵厥則時煩時止未為死候但因此而馴至胃中無
陽則死也烏梅圓中酸苦辛溫互用以安虵溫胃益
虛久利而便膿血亦主此者能解陰陽錯雜之邪故
也

十二傷寒熱少厥微指頭寒默默不欲食煩燥數日小
便利色白者此熱除也欲得食其病為愈若厥而嘔胸
脇煩滿者其後必便血

原文

熱少厥微指頭微寒其候原不重然默默不欲食煩燥數日胃中津液傷而坐困矣若小便利色白則胃熱暗除故欲得食若厥而嘔胸脇滿不去則邪聚中焦其後陰邪必走下竅而便血以厥陰主血也

十三傷寒發熱四日厥反三日復熱四日厥少熱多其病當愈四日至七日熱不除者必便膿血傷寒厥四日熱反三日復厥五日其病為進寒多熱少陽氣退故為進也

原文

以陰陽進退之義互舉其旨躍然

十四傷寒六七日脈微手足厥冷煩燥灸厥陰厥不還

者死

原文

脈微而厥更加煩燥則是陽微陰盛用灸法以通其陽而陽不回則死也

十五傷寒發熱下利厥逆燥不得卧者死

原文

十六傷寒發熱下利至甚厥不止者死

原文

厥證但發熱則不死以發熱則邪出於表而裏證自

除下利自止也若反下利厥逆煩燥有加則其發熱又為陽氣外散之候陰陽兩絕亦主死也

十七發熱而厥七日下利者為難治

原文

厥利與熱不兩存之勢也發熱而厥七日是熱者自熱厥利者自厥利兩造其偏漫無相協之期故雖未現煩燥等証而已為難治蓋治其熱則愈厥愈利治其厥利則愈熱不至陰陽兩絕不止矣

十八傷寒六七日不利便發熱而利其人汗出不止者

死有陰無陽故也

原文

六七日不利忽發熱而利渾是外陽內陰之象此中
伏有亡陽危機所以仲景蚤為回護用溫用灸以安
其陽若俟汗出不止乃始圖之則無及矣可見邪亂
厥陰其死生全關乎少陰也不然厥陰之熱深厥深
何反謂之有陰無陽哉

十九病者手足厥冷言我不結胸小腹滿按之痛者此
冷結在膀胱關元也

原文

陽邪必結於陽陰邪必結於陰故手足逆冷腹滿按之痛者邪不上結於胸其非陽邪可知其為陰邪下結可知則其當用溫用灸更可知矣關元在臍下三寸為極陰之位也

二十傷寒五六日不結胸腹濡脈虛復厥者不可下此為亡血下之死

原文

傷寒五六日邪入厥陰其熱深矣乃陽邪不上結於胸陰邪不下結於腹其脈虛而復厥則非熱深當下

之比繇其陰血素虧若悞下之以重亡其陰必主死也此厥陰所以無大下之法而血虛之人尤以下為大戒矣

二十一手足厥寒脈細欲絕者當歸四逆湯主之若其人內有久寒者宜當歸四逆加吳茱萸生薑湯主之

原文

前條之脈虛此條之脈細互見其義虛細總為無血不但不可用下并不可用溫蓋脈之虛細本是陽氣衰微然陰血更為不足故藥中宜用歸芍以濟其陰

不宜用薑附以劫其陰也即其人素有久寒者但增吳茱萸生薑觀之是則乾薑附子寧不在所禁乎此而推之妙義天開矣

二十二大汗出熱不去內拘急四肢疼又下利厥逆而惡寒者四逆湯主之

原文

大汗出而熱反不去正恐陽氣越出軀殼之外若內拘急四肢疼更加下利厥逆惡寒則在裏純是陰寒宜亟用四逆湯以回其陽而陰邪自散耳

二十三大汗若大下利而厥冷者四逆湯主之

原文

此證較上條無外熱相錯其為陰寒易明然既云大汗大下利則陰津亦亡但此際不得不以救陽為急俟陽回尚可徐救其陰所以不當牽制也

二十四傷寒脈促手足厥逆者可灸之

原文

傷寒脈促則陽氣踴躍可知更加手足厥逆其陽必為陰所格拒而不能返故宜灸以通其陽也

二十五傷寒脈滑而厥者裏有熱也白虎湯主之

原文

滑為陽脈其裏熱熾盛可知故宜行白虎湯以解其熱與三陽之治不殊也

二十六病人手足厥冷脈乍緊者邪結在胸中心下滿而煩饑不能食者病在胸中當須吐之宜瓜蒂散

原文

手足厥冷疑似陰邪其脈有時乍緊則是陽邪而見陽脈也陽邪必結於陽所以邪結在胸中心下煩滿饑不能食也此與太陽之結胸迥殊其脈乍緊其邪亦必乍結故用瓜蒂散湧載其邪而出斯陽邪仍從

陽解耳

二十七傷寒厥而心下悸者宜先治水當用茯苓甘草湯却發其厥不爾水漬入胃必作利也

原文

太陽篇中飲水多者心下必悸故此厥而心悸者明係飲水所致所以乘其水未漬胃先用茯苓甘草湯治水以清下利之源後乃治厥庶不致厥與利相因耳

二十八傷寒六七日大下後寸脈沉而遲手足厥逆下

部脈不至咽喉不利唾膿血泄利不止者為難治麻黃
升麻湯主之

原文

此表裏錯雜之邪最為難治然非死證也大下後寸
脈沉而遲手足厥逆則陽氣陷入陰中下部脈不至
則陰氣亦復衰竭咽喉不利唾膿血又因大下傷其
津液而成肺痿金匱曰肺痿得之被快藥下利重亡
津液者是也泄利不止未是下焦虛脫但因陽氣下
陷所致故必升舉藥中兼調肝肺乃克有濟此麻黃

升脈所以名湯而謂汗出愈也

按寸脈沉而遲明是陽去入陰之故非陽氣衰微可擬故雖手足厥逆下部脈不至泄利不止其不得為純陰無陽可知况咽喉不利唾膿血又陽邪搏陰上逆之徵驗所以仲景持於陰中提出其陽得汗出而錯雜之邪盡解也

二十九傷寒四五日腹中痛若轉氣下趨少腹者此欲

自利也

原文

腹中痛多屬虛寒與腹中實滿不同若便轉氣下趨少腹則必因腹寒而致下利明眼見此自當圖功於未著矣

三十傷寒本自寒下醫復吐下之寒格更逆吐下若食入口即吐乾薑黃連黃芩人參湯主之

原文

本自寒下是其人之平素胃寒下利也較上條之轉氣下趨少腹者更為已然之事矣所以纔病傷寒即不可妄行吐下與病人舊微溏不可服梔子湯互意

舊微瀉而用梔子則易湧易泄本自寒下而施吐下
則吐下更逆其理甚明註家不會其意寒格者因誤
施吐下之寒藥致成格拒也若食入口即吐格拒極
矣故用乾薑人參以溫補其胃用黃連黃芩之苦以
下逆氣而解入裏之熱邪也

三十一下利脈沉而遲其人面少赤身有微熱下利清
穀者必鬱冒汗出而解病人必微厥所以然者其面戴
陽下虛故也

原文

下利脈沉遲裏寒也面少赤有微熱則仍無外邪必
從汗解但戴陽之證必見微厥汗中大伏危機其用
法即迥異嘗法下條正其法也

三十二下利清穀裏寒外熱汗出而厥者通脈四逆湯
主之

原文

上條辨證此條用藥兩相互發然不但此也少陰病
下利清穀面色赤者已用其法矣要之通之正所以
收之也不然豈有汗出而反加蔥之理哉

三十三下利手足厥冷無脈者灸之不溫若脈不還反

微喘者死

原文

灸之不溫脈不還已為死證然或根柢未絕亦未可知設陽氣隨火氣上逆胸有微喘則孤陽上脫而必死矣與少陰病六七日息高者死正同

三十四下利後脈絕手足厥冷晬時脈還手足溫者生脈不還者死

原文

厥利無脈陽去而難於返矣然在根本堅固者生機

尚存一綫經一週時脈還手足復溫則生否則死矣
此即互上條用灸之意所以不重贅灸法也少陰下
利厥逆無脈服白通湯脈暴出者死微續者生厥陰
下利厥逆脈絕用灸法晬時脈還者生不還者死可
見求陽氣者非泛然求之無何有之鄉也根深寧極
之中必有幾微可續然後藉溫灸為鸞膠耳

三十五下利腹脹滿身體疼痛者先溫其裏乃攻其表

溫裏宜四逆湯攻表宜桂枝湯

原文

此與太陽中篇下利身疼用先裏後表之法大同彼因誤下而致下利此因下利而致腹脹總以溫裏為急者見晁曰消之義也身疼痛有裏有表必清便已調其痛仍不減方屬於表太陽條中已悉故此不贅三十六下利清穀不可攻表汗出必脹滿

原文

此條重舉下利清穀不可攻表以示戒正互明上條所以必先溫裏然後攻表之義也見誤攻其汗則陽出而陰氣瀰塞胸腹必致脹滿而釀變耳

三十七傷寒下利日十餘行脈反實者死

原文

實為邪盛邪盛必正脫也

三十八下利有微熱而渴脈弱者令自愈下利脈數而渴者令自愈設不差必清膿血以有熱故也下利脈數有微熱汗出令自愈設復緊為未解

原文

微熱而渴證已轉陽然正恐陽邪未盡也若脈弱則陽邪已退可知故不治自愈脈數與微熱互意汗出與脈弱互意脈緊則不弱矣邪方熾盛其不能得汗

又可知矣

三十九下利寸脈反浮數尺中自濇者必圜膿血

原文

清圓同義脈見浮數若是邪還於表則尺脈自和今尺中自濇乃熱邪搏結於陰分雖寸口得陽脈究竟邪必走下竅而便膿血也

四十下利脈沉弦者下重也脈大者為未止脈微弱數者為欲自止雖發熱不死

原文

下利而脈沉弦主裏急後重成滯下之證即所稱痢

證也脈大者即沉弦中之大脈微弱數者即沉弦中之微弱數也脈微弱數雖發熱不死則脈大身熱者其死可知矣

四十一熱利下重者白頭翁湯主之

原文

熱利下重互上文即傷寒轉痢之謂也

四十二下利欲飲水者以有熱故也白頭翁湯主之

原文

此從上條另申一義見凡下利欲飲水者與藏寒利而不渴自殊乃熱邪內耗津液縱未顯下重之候亦

當以前湯勝其熱矣

四十三下利譫語以有燥屎也宜小承氣湯

此與陽明經譫語胃中有燥屎正同乃不用大承氣而用小承氣者以下利腸虛兼之厥陰藏寒所以但用小承氣微攻其胃全無大下之條耳

四十四下利後更煩按之心下濡者為虛煩也宜梔子

豉湯

原文

已下利而更煩似乎邪未盡解然心下濡而不滿則

為虛煩與陽明誤下胃虛膈熱之證頗同故俱用湯法也

四十五嘔而發熱者小柴胡湯主之

原文

厥陰之邪上逆而兼發熱乃肝膽藏府相連之證也故用小柴胡湯分解其陰藏陽府之嘔熱也

四十六嘔而脈弱小便復利身有微熱見厥者難治四

逆湯主之

原文

嘔而脈弱小便便利裏虛且寒身有微熱證兼表裏其

人見厥則陰陽互錯故為難治然不難於外熱而難於內寒也內寒則陽微陰盛天日易霾故當用四逆湯以回陽而微熱在所不計也况乾薑配附子補中有發微熱得之自除耶

四十七乾嘔吐涎沫者吳茱萸湯主之嘔家有癰膿者不可治嘔膿盡自愈

原文

厥陰之邪上逆而乾嘔吐涎沫可用吳茱萸湯以下其逆氣若陰邪上逆結而為癰潰出膿血即不可復

治其嘔正恐人誤以吳茱萸湯治之耳識此意者用
辛涼以開提其膿亦何不可耶

按厥陰篇中次第不一有純陽無陰之證有純陰
無陽之證有陰陽差多差少之證有陽進欲愈陰
進未愈之證復有陰居八九陽居一二之證厥而
發熱熱深厥深上攻而成喉痺下攻而便膿血此
純陽無陰之證也脈微細欲絕厥冷灸之不溫惡
寒大汗大利燥不得卧與夫冷結關元此純陰無

陽之證也厥三日熱亦三日厥五日熱亦五日手足厥冷而邪熱在胸水熱在胃此陰陽差多差少之證也渴欲飲水饑欲得食脈滑而數手足自溫此陽進欲愈之證也默默不欲食寸脈雖浮數尺脈自濇嘔吐涎沫腹脹身疼此陰進未愈之證也下利清穀裏寒外熱嘔而脈弱小便復利本自寒下復誤吐下脈沉微厥面反戴陽此陰居八九陽居一二之證也大率陽脈陽證當取用三陽經治

法陰脈陰證當合用少陰經治法厥陰病見陽為
易愈見陰為難痊其表裏雜錯不分又必先溫其
裏後攻其表設見咽喉不利咳唾膿血則溫法不
可用仍宜先解其表矣世醫遇厥陰諸證如涉大
洋茫無邊際可測是以動手即錯茲不厭繁複闡
其要旨俾後學奉為指南云

再按厥陰經原無下法首條即先示戒云下之利
不止矣蓋厥陰多至下利下利中復有死證金匱

云五藏氣絕於內則下利不禁此所以致戒不可
下耶中間雖有用小承氣一法因胃有燥屎微攻
其胃非攻其腸也雖有厥應下之一語乃對發汗
而言謂厥應內解其熱不應外發其汗耳豈可泥
應下二字遂犯厥陰之大戒耶自晉迄今傷寒失
傳遇陽明二三日內當下之證及少陰二三日急
下之證總不能下至厥陰六七日不當下之時反
行下之在熱深厥深之陽證下之已遲萬一僥倖

不過為焦頭爛額之客在亡血藏虛之人下之百無一生矣幾千年來孰任殺人之辜耶

過經不解

法四條
附三陰經後

過經不解者由七八日已後至十三日已後病過一候二候猶不痊解也然邪在身中日久勢必結聚於三陽太陽為多少陽次之陽明又次之及至三陰則生死及掌不若此之久持矣

辨陽症用大小柴胡兩解一法

一太陽病過經十餘日反二三下之後四五日柴胡證仍在者先與小柴胡湯嘔不止心下急鬱鬱微煩者為未解也與大柴胡湯下之則愈

原文

過經十餘日而不知太陽證有未罷反二三下之因而致變者多矣後四五日柴胡證仍在未有他變本當行大柴胡兩解表裏但其人之邪屢因誤下而深入即非大柴胡下法所能服故必先用小柴胡提其邪出半表然後乃用大柴胡始合法也

辨過經不解心下欲吐微煩微滿用藥宜審一法

二太陽病過經十餘日心下溫溫欲吐而胸中痛大便反溏腹微滿鬱鬱微煩先此時自極吐下者與調胃承氣湯若不爾者不可與但欲嘔胸中痛微溏者此非柴胡證以嘔故知極吐下也

原文

此條註解不得仲景叮嚀之意茲特明之太陽病過經十餘日心下溫溫欲吐而不吐其人胸中痛大便秘反溏腹微滿鬱鬱微煩者此有二辨若曾經大吐大

下者邪從吐解且已入裏可用調胃承氣之法若未
極吐下但欲嘔不嘔胸中痛微澹者是痛非吐所傷
澹非下所致調胃之法不可用矣豈但調胃不可用
即柴胡亦不可用以邪尚在太陽高位徒治陽明少
陽而邪不服耳解太陽之邪仲景言之已悉故此但
示其意也若其人能嘔則是為吐下所傷而所主又
不在太陽矣

過經證屬可下誤用圓藥增利辨內實內虛二法

三傷寒十三日胸脇滿而嘔日晡所發潮熱已而微利此本柴胡證下之而不得利今反利者知醫以圓藥下之非其治也潮熱者實也先宜小柴胡以解外後以柴胡加芒硝湯主之

原文

胸脇滿而嘔邪在少陽表裏之間也發潮熱裏可攻也微下利便未硬也以大柴胡分解表邪蕩滌裏熱則邪去而微利亦自止矣若誤用圓藥則徒引熱邪內陷而下利表裏俱不解也故先用小柴胡分提以

解外邪後加芒硝以滌胃中之熱也

四傷寒十三日不解過經譫語者以有熱也當以湯下之若小便利者大便當鞭而反下利脈調和者知醫以圓藥下之非其治也若自下利者脈當微厥今反和者此為內實也調胃承氣湯下之

原文

二條俱見微利之證難辨其內虛內實上條胸脇滿而嘔邪湊少陽之表故欲下之必用柴胡湯為合法若以他藥下之表邪內入即是內虛此條原無表證

雖圓藥悞下其脈仍和即為內實也

按仲景下法屢以用圓藥為戒惟治太陽之脾約乃用麻仁圓因其人平素津枯腸結必俟邪入陽明下之恐無救於津液故雖邪在太陽即用圓藥之緩下潤其腸俾外邪不因峻攻而內陷乃批卻導竄游及空虛之妙也此等處亦須互察

再按傷寒證以七日為一候其有二候三候不解者病邪多在三陽經留戀不但七日傳之不盡即十日

十三日二十餘日尚有傳之不盡者若不辨證徒屈指數經數候汗下展轉差誤正虛邪湊愈久愈難為力與內經至七日太陽病衰頭痛少愈八日陽明病衰身熱少歇九日少陽病衰耳聾微聞十日太陽病衰腹減如故則思飲食十一日少陰病衰渴止舌潤而嚏十二日厥陰病衰囊縱少腹微下大氣皆去病人精神爽慧之恒期迥異矣所以過經不解當辨其邪在何經而取之仲景云太陽病頭痛至七日以上

自愈者以行其經盡故也即內經七日太陽病衰頭
痛少愈之旨也可見太陽一經有行之七日以上者
矣其欲作再經者鍼足陽明使經不傳則愈以太陽
既羈留多日則陽明少陽亦可羈留過經漫無解期
矣所以早從陽明中土而奪之俾其不傳此捷法也
若謂六經傳盡復傳太陽必無是理後人墮落成無
已阱中耳豈有厥陰兩陰交盡於裏復從皮毛外再
入太陽之事耶請破此大惑

差後勞復陰陽易病

附三陰經後

卷四下

一太病差後勞復者枳實梔子豉湯主之若有宿食者

加大黃如博碁子大五六枚

原文

勞復乃起居作勞復生餘熱之病方註作女勞復大
謬女勞復者自犯傷寒後之大戒多死少生豈有反
用上湧下泄之理耶太陽中篇下後身熱或汗吐下
後虛煩無奈用本湯之苦以吐徹其邪此非取吐法
也乃用苦以發其微汗正內經火淫所勝以苦發之

之義觀方中用清漿水七升空煮至四升然後入藥
同煮全是欲其水之熟而趨下不致上湧耳所以覆
令微似汗精絕

二傷寒差已後更發熱者小柴胡湯主之脈浮者以汗
解之脈沉實者以下解之

原文

差已後更發熱乃餘熱在內以熱召熱也然餘熱要
當辨其何在不可泛然施治以虛其虛如在半表半
裏則仍用小柴胡湯和解之法如在表則仍用汗法

如在裏則仍用下法然汗下之法即互上條汗用枳實枳實豉微汗下用枳實枳實豉加大黃微下也

三大病差後從腰以下有水氣者牡蠣澤瀉散主之

原文

腰以下有水氣者水漬為腫也金匱曰腰以下腫當利小便此定法矣乃大病後脾上告困不能攝水以致水氣泛溢用牡蠣澤瀉散峻攻何反不顧其虛耶正因水勢未犯身半以上急驅其水所全甚大設用輕劑則陰水必襲入陽界驅之無及城不沒者三版

亦云幸矣可見活人之事迂疎輩必不能動中機宜庸工遇大病後悉行溫補自以為善孰知其為鹵莽滅裂哉

四大病差後喜唾久不了了者胃上有寒當以圓藥溫之宜理中圓

原文

身中津液因胃寒凝結而成獨唾久而不清其人必消瘦索澤故不用湯藥蕩滌而用圓藥緩圖也理中圓乃區分陰陽溫補脾胃之善藥然仲景差後病外

邪已盡纔用其方在太陽邪熾之日不得已合桂枝用之即更其名曰桂枝人參湯又云醫以理中與之利益甚理中者理中焦此利在下焦非其治也於此見用法之權衡矣

五傷寒解後虛羸少氣氣逆欲吐者竹葉石膏湯主之
原文

身中津液為熱邪所耗餘熱不清必致虛羸少氣難於康復若更氣逆欲吐是餘邪復挾津液滋擾故用

竹葉石膏湯以益虛清熱散逆氣也

六病人脈已解而日暮微煩以病新差人強與穀脾胃氣尚弱不能消穀故令微煩損穀則愈

原文

脈已解者陰陽和適其無表裏之邪可知也日暮微煩者日中衛氣行陽其不煩可知也乃因脾胃氣弱不能消穀所致損穀則脾胃漸趨於旺而自愈矣註家牽扯日暮為陽明之王時故以損穀為當小下不知此論差後之證非論六經轉陽明之證也日暮即

內經日西而陽氣已衰之意所以不能消穀也損穀當是減損穀食以休養脾胃不可因前條宿食例輕用大黃重傷脾胃也

合六條觀之差後病凡用汗下和溫之法但師其意不泥其方恐元氣精津久耗不能勝藥耳豈但不能勝藥抑且不能勝穀若損穀則病愈而用藥當思減損并可識矣其腰已下有水氣峻攻其水亦以病後體虛膀胱氣化不行若不一朝迅埽則久困之脾土

必不能堤防水逆不至滔天不止所以仲景云少陰
負跌陽者為順故急奪少陰之水以解跌陽之圍夫
豈尋常所能測識耶

一傷寒陰陽易之為病其人身體重少氣少腹裏急或
引陰中拘攣熱上衝胸頭重不欲舉眼中生花膝脛拘
急者燒裊散主之原文

陰陽易之病註家不明言乃致後人指為女勞復大
謬若然則婦人病新差與男子交為男勞復乎蓋病


傷寒之人熱毒藏於氣血中者漸從表裏解散惟熱
毒藏於精髓之中者無繇發泄故差後與不病之體
交接男病傳不病之女女病傳不病之男所以名為
陰陽易即交易之義也其證眼中生花身重拘急少
腹痛引陰筋暴受陰毒又非薑桂附子辛熱所能驅
故燒裯襦為散以其人平昔所出之敗濁同氣相求
服之小便得利陰頭微腫陰毒仍從陰竅出耳

此條叔和彙於差後勞復之前因起後人女勞復之

疑今移附勞復後益見熱病之為大病差後貽毒他人其惡而可畏有如此也

尚論張仲景傷寒論凡八卷前四卷詳論六經證治已盡傷寒之義矣後四卷推廣春月溫病夏秋暑濕熱病以及脈法諸方聊與二三及門揚確千古稿藏笥中欲俟百年身盡名滅然後梓行以其刻意求明令天下業醫之子從前師說漫無着落必反嫉為欺世盜名耳不謂四方來學日衆手編

不便抄錄姑將前四卷授梓求正大方儻坊間購
刻全本人書具在寧致貽憾於續貂乎



尚論篇卷四下